

宋・俞

琰撰

易學叢
書續編

俞氏易集說
(下)

廣文書局印行

中華民國六十三年九月初版

易學叢
書續編

俞氏易集說

精裝上下定價新台幣：四百八拾元

版權所有
不准翻印

撰 者

俞

琰

發行人

王

道

榮

發行所

廣文書局有限公司

經銷者

全國各大書局

臺北市羅斯福路二段九號之三
郵政劃撥二一九九帳號
電話三四九六六〇號

內政部出版業登記證內版台業字第一三二四號

周易彖傳上

林屋山人俞琰集說

大哉乾元萬物資始乃統天

紫陽朱子曰此專以天道明乾義又曰此一節首釋元義愚謂彖辭云元亨利貞不過謂大亨而利於正彖傳分而爲四又以元爲重故特贊之曰大哉乾元物有氣斯有形始者氣之元生者形之元形雖資坤而生氣則資乾而始故曰萬物資始夫乾之元亨利貞析之以配四時固皆天之德若獨論乾元之大則元者生意也亨者生意之長利者生意之遂貞者生意之成亨利貞之三者皆屬元

之所統故曰乃統天統者以一該衆無所不總之
謂大莫大於天而元統之則天亦萬物中之物耳
元其大矣哉

雲行雨施品物流形

紫陽朱子曰此釋乾之亨也愚謂乾之亨乃陽氣
亨通而物皆暢達之時是時天油然作雲沛然下
雨凡昔之凝滯者皆至此而流動昔之潛伏者皆
至此而形見故曰雲行雨施品物流形施去聲始
豉反前言萬物此言品物萬與品同歟異歟曰元
爲稟氣之始未可區別故總謂之萬亨則流動形
見而洪纖高下各有區別故特謂之品或疑孔子

贊乾四德獨不言亨何也誠齊楊氏曰言元言利貞而不言亨非不言亨也雲行雨施品物流形即亨也節齋蔡氏曰雲行雨施亨之見乎氣也品物流形亨之見乎形也

大明終始六位時成時乘六龍以御天

終謂下乾之終九三是也始謂上乾之始九四是也九三九四乃乾下乾上之交接處一乾方終一乾又始則生意於此續而不絕故不曰始終而特曰終始說卦云終萬物始萬物亦是此意彼言柔東北丑寅之交此則言兩乾上下之交也或以初爲始上爲終初上乃一卦之始終非此之謂也或

以元爲始貞爲終元貞乃四德之始終非此之謂也大明終始謂聖人大明天道之終始以示人也六位卦之六畫也易六畫而成卦一畫有一畫之位一位有一位之時乾六位各以時成則乾道於是乎備矣乾而止於三畫則終而无繼豈生生之謂易哉所謂大明終始所謂六位時成皆發明重乾六畫之義六龍乾之六爻也六位言六畫之定分六龍言六爻之變象六位乃諸卦之所同六龍則純乾之所獨也時乘六龍以御天謂聖人當此之時乘六陽之亨通以行天道與天道同一亨通也紫陽朱子曰此言聖人之元亨也

乾道變化各正性命保合太和乃利貞

紫陽朱子曰此言乾道變化无所不利而萬物各得其性命以自全以釋利貞之義也愚謂乾道天之道也變化陰陽之變化也陰變爲陽陽化爲陰寒暑之往來是也寒往則暑來暑往則寒來一往一來而不已是之謂道天道之所以爲變化者何變化萬物也萬物蓋隨四時之推移而爲之變爲之化也天所賦爲命物所受爲性物受天之所賦自形自色自生自長莫不小遂其小大遂其大是爲各正性命謂各得其性命之正也大音泰大和即元氣也保謂保全而无虧合謂合聚而不散物

皆歛華就實而保合大和則又爲來春發生之地也乃利貞者由是而利貞也承上文之意推本元亨而言也蓋自元而亨亨而利利而貞貞則又元不貞則無以爲元元乃物之萌芽初出時亨乃物之長茂時利乃物之收斂時貞乃物之結實而歸宿處唯有此歸宿處是以貞下起元靜極而復動冬極而復春生意常周流而不絕若使元亨而不利貞春夏而不秋冬則元氣磔裂發散無餘而乾道或幾乎熄矣何變化之有

首出庶物萬國咸寧

紫陽朱子曰此言聖人之利貞也愚謂聖人聰明

審知冠乎羣倫超出庶物足以有臨足以表正萬
邦而天下皆得其所安故曰首出庶物萬國咸寧
首即元也萬國願戴聖人爲首亦猶萬物資始於
乾之元也孔子贊乾之利貞而又言首其意亦可
見矣蓋曰貞不終於貞而貞之後又繼以元也聖
人體乾之元出而君臨萬國是爲萬國之元首萬
國各有其君則又各爲其國之首蓋推廣乾元之
大以見生生之道无窮也乾彖傳三言物初言萬
物次言品物又言庶物何其異耶曰萬物偕天而
言也品物以在地而言也庶物即品物對人君而
言則謂之庶庶者眾也

至哉坤元萬物資生乃順承天

乾天道也坤地道也天尊地卑故乾元稱大坤元稱至至義差緩雖不若大之盛然乾之所至坤亦至焉坤元蓋與乾元同其大也孔子嫌於兩大同稱故變文而贊坤之元曰至哉所以尊乾也聖人於尊卑之辨謹嚴如此萬物資乾元以始有氣而未有形資坤元以生乃有形父母之道也是故天氣不下降於地則地亦不能生物地之生物乃順而承天之施也承受也奉也坤順乾而受乾之施下奉上之道也

坤厚載物德合无疆含弘光大品物咸亨

順與厚皆坤德順而承天之施所以生物厚而合天之无疆所以載物乾德之大无不覆幬而无此疆爾界之限坤德之厚无不持載亦无此疆爾界之限是之謂合夫坤其靜也翕翕則含弘其動也闢闢則光大含弘如此光大如此是以品物咸得亨通也或曰陽明而陰暗陽大而陰小光大者乾之德坤安得光大曰坤之德含容弘博而與乾合則亦光明盛大也孔子贊坤之德不曰大而曰至蓋以尊无二上而不可與乾並稱次贊坤之亨乃曰含弘光大則坤德之大實與乾同不然坤何以爲乾之配

牝馬地類行地无疆柔順利貞君子攸行

龍行天之物故以象天馬行地之物故以象地坤
順而承天是以博厚載物而合乾无疆牝馬柔順
而類地是以引重致遠而行地无疆彖辭云利牝
馬之貞孔子加以柔順二字而釋之曰柔順利貞
何也彖辭云君子有攸往自連下文孔子併及之
而釋之曰君子攸行又何也曰孔子所以錯綜其
辭者蓋又發明文王言外之意而謂君子所行柔
順而貞則宜柔順而不貞則不宜也孝經云故當
不義則子不可以不爭於父臣不可以不爭於君
故當不義則爭之從父之令又焉得爲孝乎坤臣

子之道也臣子之事君父唱則必應固不可不柔
順然倡之不以道而亦應焉則過於柔順而不貞
矣過於柔順而不貞則柔爲小人之善柔順爲小
人之阿順豈君子之所宜哉

先迷失道後順得常西南得朋乃與類行東北喪朋
乃終有慶安貞之吉應地无疆

坤不能自行順乾之健而行君子有攸往先則迷
而失其道後則順而得其常西南允離巽皆坤朋
乃與類行東北雖喪其朋然陰當從陽乃終有得
主之慶慶叶韻平聲音羌君子之出處隨地而安
隨地而貞不限西南東北皆吉故曰安貞之吉應

地无疆方其在西南則安於西南猶女子在室則
安於父母家及其往東北則安於東北猶女子嫁
而從夫則安於夫家在此亦貞而吉往彼亦貞而
吉君子無入而不自得焉或者乃謂惟當貞於陽
方不當貞於陰方則拘於一而與應地无疆之義
背馳矣坤彖傳凡三言順三言无疆順坤德无疆
則乾德也坤合乾之无疆則地亦无疆是故馬之
无疆類地君子之无疆應地

屯剛柔始交而難生動乎險中大亨貞雷雨之動滿
盈天造草昧亘建侯而不寧

易六十四卦惟乾坤二卦純剛純柔无所謂上下

之乘承亦無所謂內外之配應其餘六十二卦則皆剛柔錯雜乃有乘承配應既有乘承配應則其說千變萬化而無窮矣剛謂乾之九柔謂坤之六始交謂乾之初交坤之初而成震難生謂坎水之險在前此合上下二體釋卦之名義也動者震之德險者坎之德震在坎中是謂動乎險中此雖具上下卦二體之德並言其意則在初九初九蓋屯之主爻也大釋元字大亨貞謂屯之時動則可以出險而大亨固不容不動然又不可遽動唯以貞道固守則利也陽在陰中則激而爲雷陰陽和洽則炁而爲雨雷雨之動滿盈謂震雷坎雨閉固鬱

塞必至於滿盈而後動以象屯道艱難而未能遽通也天造時運也草震象謂雜亂而未定也昧坎象謂幽暗而未明也屯之時如此豈宜有所往唯宜建侯建侯所以濟難也不寧不遑寧處也難生故不寧侯未建則難未解欲寧處得乎

山下有險險而止蒙蒙亨以亨行時中也匪我求童蒙童蒙求我志應也初筮告以剛中也再三瀆瀆則不告瀆蒙也蒙以養正聖功也

蒙卦下坎水上艮山退則困於坎水之險而不可處進則闔於艮山之止而不可往進退莫知所之是之謂蒙山下有險言卦象險而止言卦德蒙言